

**06 AUGUST**  
**RUGACIUNEA 2**  
**SCHIMBARI LA FATA**  
**A DOMNULUI**

**Молитва**

Премирный, Пребезначальный и Незаходимый Свете от Самосущнаго и присносущнаго Отца светов, безлетное и богоестественное имый бытие, яко Бог истинный от Бога истиннаго, в сиянии Единосущныя Троицы, неслиянный и нераздельный, единый всякаго в мире сущаго света источниче, во устройении всея твари зримый изряднохудожниче, паче же тварь умную и словесную образом Твоим запечатлевый, в последняя же времена воображения ради сего образа Твоего помраченнаго, долу с небесе сшедый и самый образ перстнаго приемый, да ипостасным соединением в Тебе сугубаго естества омраченное просветиши, тленное - очистиши и преобразиши, смертию ятое паки в Тебе рождением в бытие вечное новосотвориши, великодаровитый, премудрый и Всемогущий Спасителю наш, Господи Иисусе Христе!

Сего ради и плотию возоблиста еси на Фаворе пред Богозванными Твоими свидетели, да вкупе покажеш: и Боголепное Твое вочеловечение, аще и в рабии зраце бывшее: и всемогущее Твое и животворящее Воскресение, аще и поруганием смертным предваряемое: таже и преславное Твое в мир Горний с плотию Вознесение, отонудуже имать быти и велелепнейшее Твое паки пришествие: сим же паки и светлость первую и Богоподобную естества нашего смиренного показуеши, и благодатное онаго в Тебе нас ради преображением, яко предначатие и залог нетленных нам немерцающих славы в веце грядущем, во Царствии Отца Небеснаго, еже пришел еси дати, паче же рещи во еже жити нам и в неже не нуждею и силою привлекаеши, но благою волею и светлым разумением призываеши, якоже и в первом раи сладости сия быша. Вся убо сия верою приемлюще, и усты исповедающе, молим Тя и просим пред лицом Славы Твоея, нас ради преобразивыйся, Спасителю наш; во еже не тщетным быти в нас всем твоим спасительным дарованиям, просвети ум наш светом разума святаго Твоего Евангелия, да преобразуемся обновлением ума нашего, дондеже конечно вселится в нас ум Твой - Христов, яко же к тому не мыслити нам яже человеческая, но яже Божеская.

Сердце чисто созижди в нас, да узрим явственнее Тебе, истиннаго Бога нашего, и Животворящим светом лица Твоего, привлещи нашу богоборствующую волю, якоже цветы земныя по закону воли Твоея, к животворному свету солнечному обращение имут. Сам бо живяй и действуяй в нас да отложивше ветхаго человека и в Тебе яко в новаго человека облекшеся, во обновлении жизни ходити начнем, и тако по вся дни обновляющеся по внутреннему человеку и Славу Твою откровенным лицом взирающе, в той же образ преобразуемся, от славы в славу, дондеже достигнем вси и кийждо от нас един в мужа совершенна, в меру возраста исполнения Твоего Христова.

И понеже благоизволил еси от души словесныя и тела благолепнаго устроить человека, яко да тело служит словесней души, преобрази нас и самое тело смирения нашего, яко же быти сему сообразну Твоему Телу Славы: исцели е от страстей и недугов, укрепи его силы естественныя, огради от пагубнаго действия стихий; паче же преискренним с Тобою соединением во Святей Евхаристии претвори е из земнаго в небесное, из душевнаго - в духовное, да будем воистинну плоть от плоти Твоея и кость от костей Твоих, и тако прославиши Бога, согласно в телесех наших и в

душах наших на земли сей, купно душами и телесы прославимся в животе вечном. Всех нас совокупно от единого Хлеба и Чаши причащающихся, сотвори мыслити о себе, яко уды единого тела Церкви Твоея, Юже положил еси на земли яко зерно горушное к возрастанию в велие ветвистое древо Царствия Божия, дондеже покрывает всю вселенную. Соедини всех нас единомыслием исповедания спасительныя веры Твоея и друг ко другу о Тебе любовь.

Помози нам благодатию возделовати и хранити Церковь Твою, яко превозданный рай, егоже вдал еси сего ради человеку, и да не одолею Ю врата адова, дондеже покориши вся враги Царствия Твоего под ногами Твоима и возсядеш на престоле Славы Царствия Твоего, в нем же и мы с Тобою возсияти подобно солнцу имамы, zde просветившись предначинательно в Тебе преобращением. О, Господи Христе, Царю Небесный! Да будет царствие Твое, не от мира сего сущее, воистинну всего мира царством, и да узрим сие Царствие Твое, пришедшее в силе, зело вскоре. Ей, гряди, Господи Иисусе, и пребуди с нами, якоже обещался еси, до скончания века, и в безконечныя веки веков. Аминь.